

插图本中国古代史料集成

(第一輯)

一〇

綫裝書局

欽定四庫全書

明集禮卷三十二

賓禮三

遣使

總序

古者天子於服內諸侯有間問致賑賀慶致禴之禮九州之外未嘗遣使往聘也至漢高帝遣陸賈使南粵賜以印綬孝文之時復遣陸賈奉詔使南粵孝武有事四

夷遣張騫以郎使西域蘇武以中郎將使匈奴自後蕃
國有喪則吊問來聘則報命乞降則授璽綬光武建武
二十六年遣中郎將段郴副校尉王郁使南單于單于
拜伏受詔三十一年單于薨遣中郎將段郴將兵赴弔
弟左賢王莫立遣使賫書鎮慰拜授璽綬和帝永元四
年北匈奴右谷蠡王自為單于款塞乞降遣大將軍左
校尉景夔往授璽綬唐使外國謂之入蕃使武德四年
新羅遣使來貢高祖遣散騎侍郎庾文素往使賜以璽

書貞觀十五年尸羅逸多遣使入貢太宗遣衛尉丞李
義表奉勅書報使逸多東面拜受高宗二十年突厥特
勒死詔金吾將軍張玄逸都官郎中呂向賁璽書入蕃
弔祭貞元八年以祠部郎中兼御史中丞袁滋賜南詔
印憲宗元和元年遣鴻臚少卿攝御史中丞李銛為入
蕃使長史兼侍御史吳暉副之宋使外國謂之國信使
太祖開寶八年遣西上閣門使郝崇信使丹契以太常
丞呂端副之自是信使不絕真宗景德二年太常博士

周漸假太府卿右侍禁閤門祇候郭盛假西上閤門使
為契丹國生辰使職方郎中直昭文館韓國華假祕書
丞衣庫副使焦守節假西上閤門使為契丹國母正旦
使祕書丞張若谷假將作監內殿崇班郭允恭假引進
副使為國主正旦使自是歲以為常元太祖六年遣使
至畏吾兒國其主奕都護大喜厚為之禮因遣使納款
世祖中統元年遣禮部郎中孟甲員外李俊使安南大
理至元三年遣兵部侍郎黑的使日本二十八年遣禮

部尚書張立道使安南二十九年復遣梁曾陳孚使安
南召使入朝且諭其子入覲國朝混一區宇分遣使者
以柔遠人其高麗安南占城等國皆頒詔往諭復勅使
往授印綬又降香幣以祀其國之山川其柔撫四夷之
意備至今詳著開詔錫印賜予之儀作遣使篇其弔蕃
國喪祀蕃國山川之禮則見於喪禮山川等篇茲不贅
具云

詰蕃國開詔

書附

漢文帝遣陸賈賜南粵王佗書其文曰皇帝謹問南粵王甚苦心勞意朕高皇帝側室之子棄外奉北藩于代道里遼遠壅蔽樸愚未嘗致書高皇帝棄羣臣孝惠皇帝即世高后自臨事不幸有疾日進不衰以故詩暴乎治諸呂為變故亂法不能獨制廼取它姓子為孝惠皇帝嗣賴宗廟之靈功臣之力誅之已畢朕以王侯吏不釋之故不得不立今即位乃者聞王遺將軍隆慮侯書求親昆弟請罷長沙兩將軍朕以王書罷將軍博陽侯

親昆弟在真定者已遣人存問修治先人冢前日聞王發兵於邊為寇災不止當其時長沙苦之南郡尤甚雖王之國庸獨利乎必多殺士卒傷良將吏寡人之妻孤人之子獨人父子得一亡十朕不忍為也朕欲定地犬牙相入者以問吏吏曰高皇帝所以介長沙土也朕不能擅變焉吏曰得王之地不足以為大得王之財不足以為富服領以南王自治之雖然王之號為帝兩帝並立亡一乘之使以通其道是爭也爭而不讓仁者不為

也願與王分棄前患終今以來通使如故故使賈馳諭告王朕意王亦受之毋為寇災矣上褚五十衣中褚三十衣下褚二十衣遺王願王聽樂娛憂存問鄰國南粵王恐頓首願奉詔為藩臣唐武宗遣王會賜回鶻可汗勅書其文曰勅我國家統臨萬宇列塞在陰山之南先可汗總率本部建牙於大漠之北各安土宇二百餘年此天所以限隔中外不可踰越近聞為紇吃斯所敗加以飢荒國邑為墟屍僵道路今可汗稍收離散漸近邊

城將務遠圖先示文誥故茲命使宜聽朕言可汗累代
已來赤誠向國往者中原有難助剪羣兇列聖念功每
加優寵寧國咸安二公主降嫁龍庭爰及先朝復以今
公主繼好又以土無絲續歲遺繅繒恩禮轉深諸蕃榮
美久保誠信兩絕猜嫌但以國家舊章藩漢殊壤稍踰
經制豈朕所安去歲嗚唃斯特勒已至近界邊將憤激
便請驅除朕每念其無主可歸且令安撫今可汗既立
彼又降附便合率領漸復舊疆漂寓塞垣殊非良計又

得宰相頡干伽思等表借振武一城權與公主可汗居住中國之制與外蕃不同須守前代規模祖宗法度昔漢朝單于乖亂呼韓款塞宣帝送單于出朔方雞鹿塞唯賑以米粟國初太宗皇帝令李思摩建牙於漠南遺跡並存事皆可驗未有深入漢界借以一城與羌渾黨項微小雜種同為百姓實亦屈可汗之尊貴亂中國之舊規若以未復本蕃或欲別遷善地求大國聲援戢諸部交爭亦須率思歸之人且於漠南駐止朕當許公主

朝覲親問事宜儻須應接必無所恡異令彼國從此輯
寧豈不謂去危就安轉禍為福朕緣公主將可汗丹誠
來告深感于衷制置之間須存遠大故遣右金吾衛大
將軍兼御史大夫王會副使宗正少卿兼御史中丞李
師偃馳往喻懷爰定所居更申誓約神明是質豈可食
言可汗宜保一心自求多福王會李師偃至回鶻與申
誓約而還元世祖遣孟甲李文俊諭安南責其未奉王
命詔曰我祖宗以武功創業文化未修朕纂承丕緒鼎

新革故務一萬方遂自庚申歲建元為中統元年誕敷
詔赦次第頒行其不泄邇不忘遠然誠之所在事有未
遑也適大理國守臣安撫聶只陌丁馳駟表聞爾邦向
風慕義之誠及念卿昔在先朝已歸款臣服遠貢方物
故頒詔旨遣禮部郎中孟甲充南諭使禮部員外郎李
文俊充副使諭本國官僚士庶凡衣冠典禮風俗百事
一依本國舊制不須更改高麗國比遣使來請已經下
詔悉依此例除戒飭雲南等處邊將不得擅興兵甲侵

掠疆場擾亂人民外卿國官僚士庶各宜安治如故孟
甲李文俊至安南宣諭詔旨安南世子受詔奉命而還
國朝洪武二年正月遣使賜倭國爪哇西洋占城詔曰
昔帝王之治天下凡日月所照無有遠邇一視同仁故
中國尊安四方得所非有意於臣服之也自元政不綱
天下兵爭者十有七年四方遐遠信好不通朕肇基江
左掃羣雄定華夏臣民推戴已主中國建國號曰大明
改元洪武頃者克平燕城疆宇大同以承正統方與遠

邇相安於無事以共太平之福惟爾四夷君長酋帥等
遐遠未聞故茲詔諭想宜知悉是年六月遣使封安南
國王陳日烿詔曰咨爾安南國王陳日烿惟乃祖父昔
守境於南陲傳之子孫常稱藩於中國克恭臣職以永
世封朕荷天地之靈肅清華夏頃馳書而往報異率土
以咸寧卿能奉表稱臣專使來賀法爾前人之訓以安
遐壤之民睠茲勤誠深可嘉尚是用遣官齎印仍封爾
為安南國王於戲視廣同仁思效哲王之盛典爵超五